



**Memoria xustificativa dun convenio de cooperación entre a Xunta de Galicia-
Vicepresidencia e Consellería de Presidencia, Administracións Públicas e Xustiza e o
Concello de Mos para a execución do proxecto denominado *Brigada de protección e
defensa do ambiente e espazos naturais***

1. Departamento que tramita o convenio

A Vicepresidencia e Consellería de Presidencia, Administracións Públicas e Xustiza é o órgano da Administración autonómica que en virtude do Decreto 72/2013, do 25 de abril, polo que se establece a súa estrutura orgánica, ten atribuídas a elaboración, proposta e execución da política do Goberno Galego en materia de administración local e as competencias en materia de asistencia á Administración Local, así como o fomento das liñas de colaboración coas entidades locais.

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

2. Antecedentes

A Xunta de Galicia, a través da Vicepresidencia e Consellería de Presidencia, Administracións Públicas e Xustiza, ten previsto asinar co Concello de Mos un convenio de colaboración para a execución do proxecto denominado *Brigada de protección e defensa do ambiente e espazos naturais*.

Os artigos 25 e 26.1 da Lei 7/1985, de 2 de abril, reguladora das Bases do Réxime Local e os artigos 80 e 81 da Lei 5/1997, de 22 de xullo, de Administración Local de Galicia, establecen que os municipios deberán prestar á cidadanía os servizos públicos que contribúan a satisfacer as necesidades e aspiracións da comunidade veciñal, entre as que se atopan a protección do ambiente.

Por outra banda, o artigo 25 da Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, establece que as actuacións ás que se destinará a parte do fondo que non estiver destinada ás entidades cuxo termo municipal se atope dentro da poligonal de delimitación dun parque eólico ou resulten afectadas polas correspondentes instalacións de conexión, terán que estar dirixidas á protección do ambiente, incluídas aquelas que teñan por obxecto a prevención, extinción e xestión de situacións de sinistro ou risco.

3. Finalidade

Para os efectos sinalados, tense previsto formalizar co Concello de Mos o instrumento convencional ao que se refire esta memoria, por un período de vixencia que abrangue desde o día da súa sinatura ata o 30 de novembro de 2018.

4. Obxecto do convenio

O convenio ten por obxecto fixar as liñas de cooperación entre a Xunta de Galicia, a través da Vicepresidencia e Consellería de Presidencia, Administracións Públicas e Xustiza e o Concello de Mos para a execución do proxecto denominado *Brigada de protección e defensa do ambiente e espazos naturais*.

5. Fundamentos do convenio

O concello de Mos expuxo a necesidade de obter asistencia extraordinaria para o mantemento dunha brigada de protección e defensa do ambiente e espazos naturais, integrada no servizo de urxencia municipal, que ten como finalidade a prevención, control e mantemento de zonas verdes e forestais; actuacións en materia de tratamento e control de materias perigosas e colaborar na vixilancia e extinción de incendios forestais dentro do concello de Mos e nos concellos limítrofes.

O concello manifesta que ten unha necesidade inminente e extraordinaria de realizar as tarefas de limpeza e roza dos montes queimados e da maleza, que medra descontroladamente, para atallar canto antes o potencial perigo ambiental para a veciñanza, as empresas e os traballadores dos polígonos





empresariais e para as propiedades municipais,. Esta situación vese agravada polo alto risco de incendios, debida ao abandono das parcelas de monte das que se descoñecen os seus donos, e que están próximas aos núcleos de vivendas e aos polígonos industriais do concello.

Cómpre ademais frear urxentemente a proliferación de vertedoiros ilegais que desde o comezo do verán está a sufrir o concello, resolvendo máis de 200 denuncias ambientais presentadas. Ao tempo, deben establecerse de contado tanto as medidas preventivas como a realización de traballos para que esta situación non aumente máis e chegue a provocar unha contaminación continua na vexetación e na fauna do concello.

O Concello de Mos non pode manter esta situación de deterioro ambiental, coa destrución e a erradicación da vida silvestre, sen tomar medidas inminentes e extraordinarias que produzan unha mellora da situación e permitan a prevención e a defensa contra os incendios forestais. Xa que logo, precisa da colaboración inmediata da Vicepresidencia e Consellería de Presidencia, Administracións Públicas e Xustiza para dar unha solución ás perentorias demandas, peticións e preocupacións da veciñanza relativas á prevención de incendios e á contaminación.

Estes traballos resultan imprescindibles e necesarios para o normal funcionamento da entidade local e a prestación dos servizos municipais, teñen encaixe dentro da protección do medio ambiente e do espazo natural, e responden ao obxectivo primordial da prevención, extinción e xestión de situacións de sinistro ou de risco.

Así pois, este convenio de colaboración responde ao interese público e social que representa o fomento de todas aquelas actuacións que permitan potenciar e apoiar a prestación de servizos de calidade por parte dos nosos concellos, como Administración máis próxima á cidadanía e se corresponde con actuacións financiadas de conformidade cos criterios de repartición do Fondo de Compensación Ambiental.

Este contexto local insírese nun marco orzamentario necesariamente estable que afectou todas as administracións públicas, sen que a administración local sexa unha excepción neste sentido. Deste marco deriva, entre outras consecuencias, as dificultades do Concello de Mos para afrontar en solitario o compromiso económico derivado da contratación dunha brigada ambiental, que constitúe o obxecto desta subvención.

A conxuntura descrita e o obxectivo da actuación, así como a existencia de crédito axeitado e suficiente para a súa aplicación eficaz na eliminación das carencias no servizo municipal sobre o que se actuará a través do convenio que se pretende subscribir, unido ao cumprimento dos obxectivos do Fondo de Compensación Ambiental, acreditan a existencia de razóns de interese público que xustifican o recurso ao procedemento excepcional de concesión directa dunha subvención a favor do Concello de Mos.

6. Aplicación orzamentaria e importe

Para dar cumprimento aos obxectivos deste convenio, a Vicepresidencia e Consellería de Presidencia, Administracións Públicas e Xustiza, a través da Dirección Xeral de Administración Local, achegará a cantidade máxima de TRINTA E SEIS MIL EUROS (36.000,00 €) con cargo á aplicación orzamentaria 05.23.141A.461.0 (CP 2015 00168) dos orzamentos xerais da Comunidade Autónoma para o ano 2018.

Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, con independencia de que, ao abeiro do previsto nos artigos 4 da devandita norma, lle sexan de aplicación os principios desta lei para resolver as dúbidas e lagoas que se poidan presentar.

A directora xeral de Administración Local

Marta Fernández-Tapias Núñez

Documento asinado dixitalmente á marxe

